

Ils chatschadurs duain dastgar sajettar lufs u urs

La revisiun da la lescha federala da chatscha va en consultaziun

■ (sda/anr) Il cussegl federal vul schlucclar la protecziun dal luf, da l'urs e dad autras sorts animals. El propona ch'ins dastgia decimar il dumber d'animals sch'els chaschunan gronds donns, pericliteschian umans u la varietad da las spezias. Problems datti dapi ch'ils gronds animals da rapina èn turnads en Svizra. Cunzunt ils allevaturs en las regiuns da muntogna han fadia cun il luf, damai ch'el stgarpa adina puspè animals. Urs chaschunan sporadicamain problems sch'els perdan la spuretgedad e s'avischinan als vitgs. Ina revisiun da la lescha da chatscha federala duai mitigiar tals conflicts. Il cussegl federal ha avert ier la consultaziun.

Da nov duain las autoritads betg mo pudair dar liber da sajettar singuls animals d'ina sort protegida, mabain duain pudair lubir da decimar tscherbs rotschs. La cundiziun fiss ch'ils animals smantschan la varietad da las spezias, pericliteschan umans u chaschunan in grond donn che na sa laschass betg evitar cun stentas raschunavlas.

Dapli cumpetenzza per ils chantuns

Era las cumpetenzas vegnissan repartidas da nov. Oz sto l'uffizi per l'ambient lubir da sajettar giu in animal. En l'avegnir numnass l'uffizi las spezias d'animals che dastgan vegnir reguladas. La decisiun,



La protecziun dal luf e da l'urs vegn schlucclada.

MAD

sch'els animals protegids dastgassan propri vegnir sajettads, crudass lura en ils chantuns. In donn concret na stuess betg

pli vegnir cumprovà. Il luf vegn menziunà expressivamain en la lescha, schebain ch'el tutga tenor la convenziun da Berna

tar las spezias severamain protegidas. Exceptziuns èn dentant pussaivlas en l'interess da la segirtad publica u per evitar

donns serius. Il cussegl federal aveva gia il 2013 procurà la conferma ch'ina regulaziun dals animals sa cunvegness sut tschertas circumstanzas cun la convenziun.

Unifitgar l'examen da chatscha

Cun la revisiun da la lescha da chatscha vul ins er adattar il temp da schanetg. Tuttas spezias indigenas duain avair in temp da schanetg, entant che las spezias estras sco il tshiev sika, il dam u il muflun dastgan vegnir sajettadas sur onn. Ils temps da schanetg per il portg selvadi ed il cormoran vegnessan scursanids. Sut protecziun vegnessan messas la pernisch e la sfunsella da cresta (in'anda). Il chorv champester dastgass puspè vegnir sajettà.

Plinavant propona il cussegl federal ina tscherta unificaziun tar la lubientscha da chatscha. Lezza duai er en l'avegnir vegnir dada dals chantuns. La premissa persuerter è in examen da chatscha. La materia examinada – la protecziun da las spezias e lur conturn, il diever da l'arma e tutgar la noda – duai vegnir unifitgada e renconuschida viceversa dals chantuns.

La revisiun è il resultat da pliras intervenziuns parlamentaras, tranter auter da la moziun Engler che pretendia ina regulaziun dals animals u da la moziun Fournier che ha en mira in'adattaziun da la convenziun da Berna.